



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Australian Open: HS Prannoy final-i iogo

Taoba Pakistan PM Imran Khan puogo

VOL. XX NO. 294 (ADOK 294) DIMAPUR AMUNGNÜ (SUNDAY) LUROI (AUGUST) 06, 2023 ₹ 5.00

Tizit nung kota masü atalokba atema sasar: NSCN/GPRN

Dimapur, Luroi/August 05 (TYO): Tizit nung Konyak Region kübok Aro Range kabu nung August 1, 2023 nü Akato Chopy züngsem Temzei asüba ya mepelar, ta NSCN/GPRN sangdong ka ajanga ashi.

Iba tatalokba dak sendakba nung menur ang jangjashitsür, kechiaser iba tatalokba aroka shisadangtsüsa akum, ta sangdong ajanga ashi.

Tizit nung atalokba ya

ketdangsür shingai memetet. Kilo Kilonser nema iba osang memetetdaksü.

Anungji onoki iba ken o pongpa-pongpa magizük, kechiaser yangi temzüng-ozüing nung kanga aibelena lir. Onoki Enquiry Committee ka tenteta lir aser iba tatalokba nung shilem agirtem nem tapet temerenshi agütsüsü, ta NSCN/GPRN sangdong ajangasa ashi.

OM nung aliba ama in-service doctor temi inyaksüla: NSF

Dimapur, Luroi/August 05 (TYO): Department of Health and Family Welfare, Nagaland (DoHFW) ajanga Office Memorandum (OM) ka nung In-service doctor tem dang jurila clinic lapoka mesüra private hospital nung mapa inyakba ita ka tsüingta anentsü totuyuba agütsüba pela agizüker, ta Naga Students' Federation (NSF) ajanga August 5, 2023 sangdong ka nung ashi.

Department-i iba OM mapa kuma inyakba ajanga state nung healthcare tajung len temelenshi arutsü amanger, ta ashi.

Doctor temi NPA agiaka ano duty mapang jurila inyakba (private practices) tibilemsü atema department-i mera shidak agiba ngua pelar. Iba mera yagi state nung nüburtem nem sorkari shimba doctor temi temang shidak repranga yaritsü aser iba ama tim masüba mapa inyakba doctor temi state senpong nungi menüingdakba nung sen azüingtsüba azüoktsü, ta NSF ajanga ashi.

NPA indang teyari agiaka tim masüba yimya nung 'private practices' mesüra pei jurila mozüki lapokba doctor tem jangjateta tapet temerenshi agütsüsüla, ta mapang talangka nungi NSF ajanga DoHFW dang khang aru.

Chief Minister Neiphiu Rio-i anir tang aliba state ketdangsür temi nüburtem ajangzüksü asoshi aibelener melenshija inyakyim tim lenmang nung aniba asoshi kangasa pelaba lemsateper, ta sangdong nung shia liasü.

Private hospitals, clinics aser nursing home ajungai iba OM nung shia aliba ama in-service Government Doctors, Nurses, Technicians aser Health workers tem nem mapa magütsüsü ayongzük, ta ashi.

DoHFW ajanga iba OM mapa kuma inyaksü nungloksüba state nung Deputy Commissioner ajanga dang tezüluba aser mapa nung iba duty shidak inyaksü ajungshir, NSF ajanga ashi.

Iba mapa shidak meinyakba osang Naga Students' Federation indang office dangi arura, NSF-i züpazüyima metoktsüsü, ta ashi.

National Mission on Edible Oils North-eastern states aser ano Andaman and Nicobar Islands dak rangloker Union cabinet ajanga National Mission on Edible Oils atema sen crore 11,040 lemjükja lir.

Nagaland state kisüing nunga district tenet nung oil palm lu ya ali

tasazük hectares 5423 nung lir aser anu iba oil palm cultivation atema alu tuluba akumtsü meraga Department of Agriculture ajanga mera ajak agir ama ajiteter, ta Naga Students' Federation ajangasa ashi.

Ajisüaka commercial atema oil palm tsünüba ajanga tarutsü nung asen temang, arem, lipajen aser tzi mopung melenba aser ali temu nung kongshitsü tsüboa bilemer, ta ashi.

Forest Survey of India (FSI) ajanga renemba report ka tawa Ministry of Forest, Environment and Climate Change ajanga sayaba nung, taoba küm ana tsüingta Nagaland nung arem aliba ali square kilometre 235 samaogo, ta shia liasü. Ibai talisa oil palms tsünü tenziüksü atema arem chidokba ajanga lir.

Iba süngdong atemba sentong ya manenra asen state nung arem min aser ozü-sangnu, shiruru, asem nung adokba süngjang, dangalen manguba medicinal plants aser alima tesem aika nung manguba shiruru aliba tesem samatsüsü, ta NSF sangdong ajanga ashi.

Oil palm süngdong kati anogoshi tzi litre 200 nungi 300 nüngdaker aser Nagaland state nung aiben tziungsarusa ajuru aser yimya balala nung tziunglu aruba ajanga iba ama tzi kanga agiba süngdong commercial scale nung tziünüsü tamakoktsü asüsü.

Ano oil palm tsünüba ajanga ali temu samadaktsüba, fertilizers ajanga tzi menentsüba mangu amai meyütsüsüla, ta ashi.

Alima tesem balala nung oil palm tsünüba ajanga tamakok ajuruba otsütem ketdangsür temi kanga junga bushitsüla aser state nung nüburtem nem osang shidak agütsüsüla aser rongsenketzüing ajungtsü mechi mashi leni manitsüla, ta NSF sangdong ajanga ashi.

Mizoram state nung oil palm tsünüba nung tamakok ajuruba otsü züpazüyima metoktsüsüla. Kanga mejungi rongdoker aliba cake tema nung shini agi meyütsüba nung tim masü. Rongsenketzüing ajangzüksü kisüing asoshi asen lipajen, meimchir health aser kanga kera tzi-mopung melenba senzüka metoktsüsüla.

Anungji aluyimer dang oil palm ajanga tajangzük agütsüba kisüing masü saka takoksa aser teraksa bener arutsüba indanga department-i shidak aser ochi anagatetdaksüsü ayongzük, ta NSF ajangasa ashi.



Ao Senso Telongjem Shillong pur Silver Jubilee sentong nung Shillong nung alir "Temulung Tembar" teloki ASTD naroküm ken atenba noksa nung angur. Iba telok nung Ao Baptist Arogo Shillong nung sannüker Rev.Dr.Meyu Changkiri lir. Parnoki arogo nunga shilem tajung agir.

Naga Club building atema APO & KVC telemtetba magizüker: NSF

Kohima, Luroi/August 05 (TYO): Nisungi yangluba arütsü makai aliba Naga nung ajungai Naga Club asoshi kuli ka magütsü tashi Angami Public Organisation (APO) aser Kohima Village Council (KMC) ajanga Naga Club building atema telemtetba agiba magizüktsüsü, ta Naga Students' Federation (NSF) ajanga Hokulbarnü ashi.

APO tir dangi shiti ka züluba nung NSF tir Kegwayhun Tep aser tongti zülur Siipuni Ng Philo nati ashiba agi, NSF ajanga mepishiba ama APO aser KVC ajanga telangzuba agütsüba shiti June 28, 2023 nü züluba July 4, 2023 nü angu.

Mejangjaba nisung kari May 27 anepdang Naga Club Building raksatsüba ken o tajungleni bentetsü asoshi NSF ajanga ayongzük liasü. Mapang tatsüka lir iba ki ya tang aliba Naga Club züingsem temi raksa ta sangdong.

Tayongzükba shiti den külemi NSF ajanga APO dang tang aliba Naga Club nung par tangatetba metetdaksü aser ajaki kanga

jungu metetba ken o nung tetsüingtai aitsü lenmang bushia liasü, ta parnoki ashi.

Pei sasa Naga Club ta tenüing agiba züingsem temi Naga Heritage ki raksaba ajanga mangatetep adoka aliba asoshi APO aser KVC ajanga yimjung asoshi pangzüing yangluba pela agizüker aser tangatetep kati arutsü asoshi lenmang lapoka ken o tatem kati arudaktsüsü mechi aser APO aser KVC ajanga nübur dang ayongzükba asadanga tangatetba tajung nung NSF ajanga North Police Station, Kohima nung mejangjaba nisung anema FIR benoka aliba agien, ta ashi.

Ajisüaka Naga Club Building mechi tang mangatetep adoka aliba ya ali aser yangji aliba ki kibur indang masü ta NSF ajanga indang-indanga shiogo.

NSF asoshibo Naga Club aser iba indang ki ya ali rongsen tsütsü nungi rangloksüba ki o jen ka kisüing masü.

Naga Club building ya Naga Nationalism indang monument

ka lir aser iba tangatetba tanüla teti alitsü aser kasaji tarutsü putu dena lemsateptsü. Mezüingpur aser parnok indang shisatsü tajungtem Naga nung puti otsü wazüka ayutsü meranger aser nüchiso asoshi timtema nokdaker Naga nung den maneni alitsü, ta NSF ajanga ashi.

Ibai Naga nung pei sasa yimsü süa alitsü merangba tamendak dak lir.

Ajisüaka Naga Club building aser ali ya nisung kar atema pei jangraba nung amshitsü atema ayong ayonga bilemer, shirnok dak Naga Club tenzüker mangdang tilakata maka, ta ashi.

"Iba ama nisungtemi tentetba teloki 1929 küm Simon Commission nem agütsüba Memorandum nung shia aliba mangateti tanü asüing tensa den apet ki yanglura Naga nung pei sasa yimsü süa alitsü merangba nung takum bendanga agütsüba Naga nung tanüla agi mesüshitsü," ta NSF-i ashi.

(Maneni tapak 2 nung...)

Mkg nung fortified jang dak sentakba nung shisatokden aka

Mokokchung, 5th Aug (TYO): PATH den yaritepa department of food & civil supplies, Mokokchung ajanga Fair Price Shop (FPS) dealers, village council chairmen, ward chairmen, GBs, Civil Society Organization (CSOs) aser stakeholders-tem nem Fortified Jang (Fortified Rice Kernels) indang angatetdaksüba sentong ka Mokokchung town hall nung ayongzük kaogo.

Iba sentong nung Mokokchung town kübok ward 18 den ano yimtsüingtem nungi meyongertem arua shilem agia aden. Iba sentong ya tongtibangsa "fortified rice" ajanga nübur mangmangtepba aser social media aser kibok nung tiazi olu adokba ajanga ibaji jangjashitsü atema ayongba liasü.

Tanü iba sentong nung shisalen sayur State Technical Officer, on Fortified Rice (I/C Nagaland & Manipur), family health department, PATH New Delhi, Shanpanthung Ezung-i jembidang, India, north-east state-tem nung Anaemia tashitak ya talisa tanur (6-59 months) aser tetsürtem (15-49 years) dak kanga bulua atonger, anungji, iba tashitak den raratsü atema India nung scientist-temi Food Safety

and Standards Authority of India (FSSAI) dang temang nung tashi agütsüba vitamins & minerals kar inoker yanglutsü (fortified) tetuyuba agütsü, yamaji iba nung ajemdaker fortified rice ji yanglu, anungji, iba ya plastic agi yangluba masü saka technology tasen amshia kasa jang agi anema alitsü atema mozü kar inoker jang yangluba dang, ta jangjashitsü.

Fortified rice ya nüburtem nem tang amai junga angateta meshi-i lemshiba ajanga nüburtem tsüingta temulung melemtet adok südi, saka department aser PATH-ia iba dak sentakba nung nüburtem nem Fortified jang indang angatetshiba sentong balala ayonga arudar, yakta iba dak sentakba nung YouTube video-a ka angutsü maparen tenziükogo, ta pai ashi.

Fortified jang nung ya temang nung teyari agütsüba - iron, folic acid aser vitamin B12 nungertem keta yangluba lir. Joko PDS ajanga fortified chiyungtsütem dang arutsü, taoba mapang jang arubato joko anenatoktsü aser meilongibo fortified jang ya dokan (market) nunga angutsü, ta paisa shisem.

Fortified chiyungtsü ajanga temang nung teyari agütsür ta

asüba nung talangka nungi tendanger inyakba maparen lir. Temang raksatsüsa (side effects) kecha nguteta mali. Linük aika nung ibai amshir, talisa USA limabo ibai 20th Century nungi amshir aser ibai FAO, WHO aser World Bank nungertemi nungitba mapa ka lir, anungji, yangi arendaktsü kecha mali, ta paisa jangjashitsü.

Diabetes aser pressure alirtemi arendaka bilemra, doctor den asüingdangteper achi nunga tajungba dang, saka tang tashi nung tashitak kar dak alaka iba jang chiyungba agi temang nung timtem agütsüba/mepupet adokba osang kanga apara, ta pai ashi. India nung Fortified Rice Kernels (FRK) tenzüker küm ishika dang lir, iba jang chiyungba ajanga nüburtem anema aliba (health) tsütsü jungloksü imlar, ta paisa shisem.

Paisa temetetsü kar ashidang, iba jang ya mozü inoka yangluba asünung, mapang tasasük dang yuteter, ibai kokra tzi tatsük nung meshitoktsüla (tzi tatsük jagi vitamin ajak aor), mi kanga tulu nung masotsüla mesüra vitamin ajak rongtoktsü, iba jang ya tila tanurtem nungi tantsür tambur ajaki chiyungtettsü.

(Maneni tapak 2 nung...)

Advisor Zhaleo Rio-i M/s. CY Enterprise semzüksü



Advisor, Urban Development & Municipal Affairs Department, Nagaland, Zhaleo Rio, IAS (Retd.) ajanga Bamunpukhuri -B Village nung plastic recycling industry, M/s. CY Enterprise lapoktsüdang tangokba noksa ka yangi angur.

Dimapur, Luroi/August 05 (TYO): Advisor, Urban Development & Municipal Affairs Department, Nagaland, Zhaleo Rio, IAS (Retd.) ajanga Bamunpukhuri -B Village nung plastic recycling industry, M/s. CY Enterprise tasen ka semzüksü. Iba sentong nung Advisor, Agriculture Department, Nagaland, Mhathung Yanthan aser lenir aika dena liasü.

Iba sentong nung tesemdang tongti ka ama jembidang, lanur entrepreneur kati iba ama nüburttem asoshi project tulu tezükba aser ecosystem lirumedema ayuba nung yariba asoshi Advisor Zhaleo-i pelaba aser süngmangba lemsatepa liasü.

"Tanü tensa nung ajaki 'reduce, reuse aser recycle' nung tenük yoker aser alima yaritsü atema iba enterprise tasenba ya tatishitsü tajung lir aser alima menenba tebilemtsü samadaksütsü asoshi senso ajaki yariteptsüla," ta pai ashi.

Pai nüburttem dang entrepreneur yaria aser ajungmesoa 'waste material' tem iba industry nem agütsütsü aser tajung asoshi yanglushia amshitsü ayongzüka liasü.

Sorkari teti mapa tajung nungiter aser tim department-i DMC aser danga stakeholders tem den teka amteper mapa inyaksü, ta Zhaleo-i ashi.

Nüburttem rongsenketzüng

ajungtsü mechi nüburttemi iba ama mera tajung agütsü pai ajungshia liasü.

Sentong nung Advisor, Agriculture Dept, Nagaland, Mhathung Yanthan-i alakteta jaoker ama jembidang, entrepreneur tem tim atemba angur, ta ashi.

Iba ama mera tasen takok ngua tenükba atema Yanthan-i tenüngsang agütsü aser arok ajungtsü asoshi asenoki langka tajung kar inyakdang teti nüngsen-bangsen alitsü saka tatem nung na shidak ta kuli sayutetsüsa temolungtetba nung inyaksüla, ta ashi.

CY Enterprise kibur Yanrenthung Oving-i iba industry amenokba indang tongmelang agi lemsatepba mapang, recycled plastic nungi plastic floor tiles tajung yanglutsü, ta ashi aser Tsüngrem nem tenüngsang agütsüba den külemi iba project nung yariteper ajanga dang pelaba lemsatepa liasü.

Iba firm ya DMC den angatetepa yanglu, anungji tarutsü nung DMC dumping site nung waste segregation machinery amenoktsü inyaktepba mapang lir, ta pai ashi.

Iba sentong nung T. Penthungo Lotha menden liasü aser Rev. A. K Jami, Senior Assoc. Pastor, LBC, Purana Bazaar ajanga meshiteta sarasademja liasü.

Atem aser tetsüng lenmang amala atema plastic tiles yangluba industry ya tejaoker temi repranga jaja aser item oset yanglua sayuba ngua liasü.

FAC nung "AMAJOK aser tanga otsütem" kakat saya



Fazl Ali College, Mokokchung nung August 5, 2023 nü "AMAJOK aser tanga otsütem" kakat sayaba sülen tangokba noksa ka nung Dr. I. Wati Imchen, Principal, FAC (abelen), kakat zülur Maongienla, Asst. Prof., Dept. of English aser Rev. Dr. M. Rongsen (achichi), tir, Ao Riju nungertem angur.

Dimapur, Luroi/August 05 (TYO): Fazl Ali College (FAC), Mokokchung nung Department of English nung assistant professor, Maongienla-i züluba "AMAJOK aser tanga otsütem" kakat ka Conference Hall, FAC nung August 5, 2023 nü saya.

Iba kakat ya Ao Riju tir Rev. Dr. M. Rongsen-i saysütsü aser Lima Lemdor, Pastor, FAC Union Church ajanga sarasademja liasü. Dr. I. Wati Imchen, Principal,

FAC ajanga pela agizükba o jembidang iba kakat sayatsü asoshi FAC shimba atema kakat zülur dang pelaba lemsatep.

Kakat zülur Maongienla-i iba sentong nung jembidang iba kakat takok ngua renemba nung shilem agir ajak dang pelaba lemsatepa liasü.

Iba kakat cover aser kakat telung nung noksa tem yanglutsüba atema taoba mapang lar students ana nem lai alakteta

tenüngsang agüja liasü aser Department of English, FAC ajanga la indang kakat züluba nung yaritepba asoshi pelaba lemsatepa liasü.

Bendangsenla, Associate Prof., Dept. of English, FAC ajanga iba kakat asadangba indang osang agütsüdang "AMAJOK aser tanga otsütem" ya danga otsü kakat ama masü saka Aonaro ta süir nisung ka den sendaktepa lir, ta ashi. Otsü nungbo shia mali saka zünga aorang sendaktepteter, ta lai ashi.

Iba kakat nung aliba otsütem ya shidakba nisungtemi ajuruba indang lir asünung nisung ajaki sendakteptetsü. Otsü nung nisung tejangja shia mali saka parnok inyakyim aser yimya ajanga nisung ka indang tejangja angateter, aser ibaji kakat zülur indang sempet lir, ta Bendangsenla-i ashi.

Kakat aika nung adokba nisung ya kakat zülur indang 'mouthpiece' lir saka iba kakat nung aliba nisungtem yagi kakat zülur asoshi kecha agenda mali, ta lai ashi.

Iba kakat sayaba sentong nung menden Repabenla, Asst. Prof. Department of Ao, FAC liasü. Kakat ya Amazon website nung angutsü.

Vaccine agütsütsü atema Mission Indradhanush tenzüksü

Dimapur, Luroi/August 05 (TYO): Mission Indradhanush (MI) ya 2014 küm December ita tenzükba 'flagship immunization intensification drive' ka lir aser iba yagi Universal Immunization Program (UIP) kübok Routine Immunization tali tashi taitba kumdaksür. Küm toku tsünga iba mission ya ajanga immunization coverage metetsümonga timba kumdaksü aser India nung shilem 76.4 (NFHS-5, 2019-21) tongtet, koba NFHS-4, 2015-16 nung shilem 62 dang liasü, aser Nagaland nunga NFHS-5, 2019-21 mapang shilem 58 tongtet, koba NFHS-4, 2015-16 nung shilem 35 dang liasü.

Item takokba liaka COVID-19 pandemic aser danga tayongzüka

tem ajanga terenlok nung tetsükdak ajurua liasü. Ajisüaka tanur arishi küm pongu tashi aser mashisa aliba tetsürtem doses magi alir nem vaccine agütsütsü nükjidong nung Mission Indradhanush 5.0 ya 2023 küm round asem lemsar tenzüksü lir.

Iba maparen nung session mapang balala lir, U-WIN ajanga digital data recording asütsü aser vaccine peria magütsü alirnem agütsütsü.

Mission Indradhanush round mezüngbuba ya August 7 nungi 12, 2023 tashi agütsü aser iba mapang takum asoshi lendong tulu aliba tashidak nungi kumzüka ayutsü asoshi mayimjemi aliba tanur aser mashisa tetsürtem nem vaccine agütsütsü.

NSCN/GPRN ajanga Metemneo aser Biam benjong salem lemsatep

Dimapur, Luroi/August 05 (TYO): NSCN/GPRN ajanga Yimkhiung aser Khamniungan Naga nung dangi Metemneo aser Biam benjong salem abener, koba August 4-8 (Metemneo) aser August 7 (Biam) nung amunger, ta NSCN/GPRN (Akato Chopi) indang sangdong ka ajanga ashi.

Alu nungi jenjang-menjang agizükba sülen Metemneo benjong ya amunger aser iba benjong nung Yimkhiung nüburttemi

koba anogo pongu tashi alir, aser anogoshia nungja Shito, Zhinto, Zumto, Khehresuk aser Sheresuk agüja lir, ta ashi.

Biam benjong ya Khamniungan kin-i August 7 nü amunger aser iba mapang Khamniungan sobaliba tajung biletmeta kulemkeja asür.

Item tepela aser tetetzü aketba benjongmung ajanga Yimkhiung aser Khamniungan nüburttem maneni wadang balala nung takokba lidakjangma, ta NSCN/GPRN sangdong ajangasa ashi.

Naga Club building atema APO ... (TAPAK 1 NUNGI...)

Atangji nung Naga Club building ya nüchiso asoshi raraba nung Naga nung azü aser asentzü indokba temaitsü lir aser junga meblemadangba aser nükla makar kabu nung iba tetetzü tulu mesamadaksütsü, ta parnoki ashi.

Naga nung pei sasa yimsü asütsü asoshi tenzükba revolutionary movement 'occupational forces' temi samatsütsü merandang mepetmesü adokba ajanga Naga Club tenzükba aser parnok melener temi tatongi anir marutet aser iba mechi Naga Club building nung NSF kibur ama küm aika lia aruogo, ta ashi.

Indian army temi Naga nung dak shisadangtsü mokoki tashiyim mapa jenti inyaka yipru nung aliba mapang NSF dak alaka Naga Club densema Naga nung loki tetet kata shidak inyaksangshia maru aser iba kuliji puti otsü nung lir, ta NSF ajanga ashi.

Iba ama tensa tia nung NSF lenirtem temang aser tekolok nung tepang agi meshiteta timtem jenti ajangshia aruogo aser itemji Naga nungeri meteta lir.

"Naga History wazüka ayutsü

mechi NSF lenirtem mezüngmeshi, shi temang nung timtem reshikangshi ajuruogo aser tepuokdaka yuogo, saka parnok tanüla kodanga meraksatsü," ta NSF-i ashi.

Anungji Naga Club Building wazüka ayurji NSF dang lir ta jembia aruba ya puti otsü nung tamendak dak maka jembir masü, ta ashi.

Anungji nisungi yangluba arütsü makai aliba Naga nung ajungai Naga Club asoshi kuli tejangja ka magütsü tashi NSF-i telemtetba kecha magütsü ta temolung rakpoka ashir.

Naga Club ya lidaktsütsü asünungbo, Simon Commission nem agütsüba Memorandum indang tangatetba nung ajanga-ajanga nokdaksüla, aji mesüra ibai Naga History asoshi asayamenü ka dang asütsü aser iba atema NSF-i akoka malutsü tangatetba nung lir.

APO aser KVC dak tamang akar aser Father of Naga Nation, A.Z Phizo-i pa tasünü tashi kanga meima wazüka ayuba Naga Nationalism indang puti otsü pei asoshi bilemba nisung kar nem samadaksütsü memelatsü, ta NSF lenirtemi ashi.

Mkg nung fortified jang... (TAPAK 1 NUNGI...)

Fortified jang koda yanglur, technology amshiba, tereprangtsü, koda belenshir, quality koda azioker, koda tendanger, label koma inoker, India asoshi fortified jang koda tongtibang, kechiba iba jang nungdaker, FSSAI-i fortified asütsü melaba chiyungtsütem, iba jang ajanga tajangzük kadaktsüba, fortified chiyungtsü achiba linüktem, iba ajanga temang nung teyari balala agütsüba, item indang tatongi rateta ashi.

"Iba jang ya jang agi yangluba lir, anungji, ya plastic agi yangluba

masü. Taoba mapang aruba jang dang nungi iba jang ya tajungba, kechiyung iba jang nung temang asoshi teyari agütsüba mozütem inoka lir", ta shisalen sayurisa metetdaksü.

Iba sentong nung Asst. Director, Food & Civil Supplies Mokokchung, N. Jamonger Ao-i tarurtem pelaa agizükba den iba shisatokden senden akaba nükjidong lemsatep. Sentong nung adenertemi mangatetba aika asüngdanga liasü aser shisalen sayuri itemji jangshija sensaksem tajung liasü.



Mokokchung nung ANPSA Mokokchung Unit-i ayongzüka Mokokchung district nung aliba Private school-tem ajak nungi adenshia telungjem senden sentong akadang ANPSA Central Tir Wt. Nini Sekhose-i jembidang aser Christian Standard Hr. Secondary School Changtongya-i ken atandang tangokba noksa.



August 05, 2023 nü Pragati Maidan, New Delhi nung Festival of Libraries 2023 tetenzük sentong nung Tir, Droupadi Murmu, Union Ministers of State for Culture Arjun Ram Meghwal aser Meenakashi Lekhi nunger adenba noksa nung angur.

INDIA teloktep senden Aug 31 nü Mumbai nung amentsü: Nana Patole

Mumbai, Luroi/August 05 (Agencies): Opposition teloktep INDIA senden Mumbai nung August 31 aser September 1 anogotem nung amentsü, ta Honibarnü Maharashtra nung Congress party lenir, Nana Patole-i metetdaksü.

Patole-i, iba senden ya kanga tongtibang asütsü, kechiyong 2019 küm tenüng menüksüba ken o ka nung Supreme Court-i Rahul Gandhi maitsüi MP jenjang tanaben agütsür, ta ashi.

Nana Patole-isa, "Sharad Pawar aser Uddhav Thackeray na onok den lir, aser ibaji kanga tongtibang. Iba nungji party asem (NCP, Congress, Shiv Sena (UBT)) densema lir," ta

ashi. Congress leniri, iba senden dak sendakba nung inyakyim benoktsü atema Maharashtra sorkar nem shidi ka agütsütsü, ta metetdaksü.

Ano külen Honibarnü Shiv Sena (UBT) lenir, Sanjay Raut-i, August 31 nü Uddhav Thackeray-i chief minister pongu densema opposition lenirtem atema chiyung sentong ayongzüksü, ta ashi.

Anogo ananü sendenji August 31 nikongdang Mumbai nung aliba Grand Hyatt nung tenzüksü aser September 1 nüa anepdang 10:00 ako nungi tenzüksü. Iba sülen opposition lenirtemi osangbenertem senden

ka ayongzüka jembitsü.

Opposition party tem mezüngbuba senden taküm June 23 nü Bihar yimtiba, Patna nung ayongzüka agi aser iba sendenji Bihar Chief Minister Nitish Kumar-i ayongzüka liasü. Tanabuba sendenji July 18 nü Bengaluru nung ayongzüka agi aser iba senden nungji opposition party 26-i I.N.D.I.A (Indian National Developmental Inclusive Alliance) teloktep tenteta liasü.

Sangküm Lok Sabha election nung BJP-i aniba National Democratic Alliance (NDA) teloktep den tokteptsü atema opposition party temi longjemer INDIA teloktep tentet.

Kulgam nung kiralongrartem den raradang sepai asem asü

Kulgam, August 05 (Agencies): Hokolbarnü Jammu & Kashmir kübok Kulgam district nung kiralongrartem den raradang yirur sepai asem Honibarnü süogo.

Army-i sangdong ka ajanga, "Yirua alir sepai asem mekümsükteti süogo. Kiralongrartem maneni bushidar," ta metetdaksü.

Hokolbarnü Jammu & Kashmir Police-i, kiralongrartem den raradang yirur sepai asem hospital nung treatment agidar, ta metetdakja liasü.

Hokolbarnü Kulgam ditric kübok Halan arem nung kiralongrartem aser sepaitem tsüingda rara tenzüka liasü.

Army aser Kulgam Police senteper kiralongrartem mita aoba mapang nung rara tenzüka liasü, ta Kashmir Zone Police-i twitter ajanga metetdaksü.

Ano tanga tatalokba ka nung, Jammu & Kashmir Police-i Srinagar kübok Natipora area nung Lashkar-e-Taiba (LeT) telok den sendaktepa aliba The Resistance Front (TRF) nungi kiralongrar asem puogo. Kiralongrar asem jagi Srinagar nung kiralongratsü sentong liasü.

Police-i parnok ket nungi hand grenades asem, pistol injang ter, AK-47 injang 25 aser tashishitsü kaketterem pua liasü. Kiralongrar asemji Imran Ahmad Najar, Waseem Ahmad Matta aser Wakeel Ahmad Bhat nunger lir, ta

jangjaogo.

Wakeel Ahmad Bhat ya tamalen Islamic State Jammu and Kashmir (ISJK) telok nung liasü. Pa küm ana jail nung puokba sülen Central Jail nungi bail nung chioka liasü.

Kiralongrar asem jagi TRF ket nungi injang aser tapoktsü agizüka liasü aser Srinagar nung lendong agütsütsü asalentong liasü.

Par asem anema Explosives Act kübok Arrla 3 aser 4, Arms Act kübok Arrla 25 aser Unlawful Activities (Prevention) Act kübok Arrla 18, 23 aser 39 nung ajemdaker Chanapora police station nung ken o ka benokogo aser maneni bushisüngdangdar, ta police-i metetdaksü.



August 05, 2023 nü Varanasi nung aliba Gyanvapi mosque nung Archaeological Survey of India (ASI) züngsemtemi scientific survey agiba mapang sepaitemi mosque anükba noksa nung angur.

Rajasthan nung district tasen 19 tentettsü

New Delhi, August 05 (Agencies): Rajasthan nung Ashok Gehlot-i aniba Cabinet-i High-level committee kati district tasen 19 aser division tasen asem tentettsü benokba agizükogo.

Chief Minister Ashok Gehlot-i aniba sorkari committee-i benokba agizükba sülen Rajasthan nung district ajak senteper 50 akümtsü.

Jaipur nung Cabinet senden amenba sülen Chief Minister-i, "Item district tasen ajanga state nung terenlok mapa kanga kera inyaktettsü," ta metetdaksü.

"Districts tasen tentetba ya ajanga yimsüsübaren kanga tajungba akümtsü aser maparen balala atema meta talangi district headquarters-i aotsüsa akümer nüburtemi kanga anisüngzük angutsü," ta paisa metetdaksü.

Osangbenertem den jembidang pai, district tasen atema lezmüksüba minister temi August 7 nü district tasen semzüksütsü, ta metetdaksü.

District tasen tentettsü atema tebilemba benoktsü asoshi yaküm March ita nung retired IAS officer, Ramlubhaya leniba nung high-level committee ka tenteta liasü.

Jaipur district agi Jaipur aser Jaipur Rural lemdangogo aser Jodhpur district agi Jodhpur aser Jodhpur Rural lemdanger.

Tanungba district tasentemji- Anupgarh, Balotra, Beawar, Deeg, Didwana-i, Kuchaman, Dudu, Gangapur City, Kekri, Kotputli-Behror, Khairthal-Tijara, Neem ka Thana, Phalodi, Slumber, Sanchore aser Shahpura lir.

Iba dak alia state nung division 7 aliba nungi tang tasen asem bendenlokba ajanga division ajak senteper 10 kümogo. Division tasen asemji Banswara, Pali aser Sikar lir.

Taküm küm tatembanglen state nung legislative assembly elections agitsü lia Congress sorkari sate tasem 19 tenteter.



August 05, 2023 nü Varanasi nung aliba Gyanvapi mosque nung Archaeological Survey of India (ASI) züngsemtemi scientific survey agiba mapang sepaitemi mosque anükba noksa nung angur.

Uttar Pradesh kübok Jhansi nung jabaso kati tsürabur zükset

Jhansi, August 05 (Agencies): Uttar Pradesh kübok Jhansi district nung tebur kati tetsü o tebu naprongla süng agi züksetogo, ta police-i metetdaksü.

Jhansi district kübok Gumnaar kiyong nung iba ya atalok.

Kiyongertem aser kinüngertemi ashiba agi, 2018 küm tashibo Ankit ya nüchi liasü aser competition ka atema renema liasü, ajisüaka pai PUBG asaya tenzükba sülen nungi pa tekolok tera meshidaki aküm.

Ankit tebu Lakshmi Prasad ya sorkar school ka nung tesayur inyaka liasü. Anepdang mamatzü agütsüsang par kidangi aruba mapang nung Prasad sür lia angu.

Lakshmi Prasad kinüngtsü, Vimal Devi-a lar jabasoi kanga

mejungi yiruja liasü. La hospital-i anir oa treatment tagidak mapang nung asü. Iba sülen kiyongertemi police nem iba osang metetdakja liasü.

Police ketdangser kati, "Tasü mang ka nguogo aser pa kinüngtsüjia kanga mejungi yirua lir, ta onok nem osang metetdakja liasü. Par jabasoji takdang nung pasasa shibanger liasü," ta metetdaksü.

Police-i asüngdangyaba mapang nung Ankit-i pai süng kati tebu züksetba aser tetsü yirutsüba nangzüka liasü, ta police-i metetdaksü.

Ankit'er kinünger, Vivek Jha-i, 2018 küm tashibo Ankit nüchi liasü aser tetoktepa ka atema renema liasü, ajisüaka pai PUBG game kanga asayaba ajanga pa tekolok tera meshidaki aküm, ta metetdaksü.



TIR YIMYIM YIMOBILEM (EDITORIAL)

DIMAPUR AMUNGNÜ, LUROI(AUGUST) 06, 2023

Tekümtet asoshi inyakba

Alima nung alir nisung shia atema tanüla tekümtet ya kanga tongtibang lir. Tekümtet tetezü kümzükba. Ajisüaka, tekümtet anguba ya ken atema mesüra kenü langka ka inyaker toktsütsüba masü saka tekümtet yabo maneni inyakyonga aotsüba mapa ka lir. Atangji, tekümtet anguba ya asenok ajungba agi mesüra asenok dak alangba agi masü saka Tsüngrem taochi ajanga anguba mapa ka lir. Aji oda, Laishibai ashir, Tsüngremi asenok kümzükba ya mesüra tekümtet anguba ya asenoki inyakba agi masü saka aji Tsüngrem sempet. (Efesa 2:8). Tetezü asenoksasa asenok kümzüktsüsa asenok dak tashi mali, saka Tsüngrem taochi agi asenok nem tekümtet ya sempet ka amato agütsü. Aji oda, tekümtet ya Tsüngremer angati sempet lir. Ibai Tesümgangtsü. Sempet tetezü sen agi aliba masü, asenoki aazükba masü saka angati anguba temoatsü. Ajisüaka, iba sempet ya odang amer kazütsüba sempet ka masü saka sempet denji mapa inyaktsü dena agütsür. Asenok kümzükba mesüra asenok nem tekümtet sempet agütsübaji ajanga Tsüngremi asenok dang akhidang menaba temenen madak dang masü saka ano tarutsü mapang menatsü aliba temenentem madaka takok agütsür. Tetezü, tekümtet sempet ya raraba nok nü ang ka mesük, iba yagi temenen den raratsü. Iba jagi ashir, tekümtet ya kenü atema dangbo masü saka alima nungi mepila tashi inyaktsüba mapa ka lir. Kodang asenok nem Tsüngrem tekümtet agütsür, asenokji tangang tasen poktetba taküm ka ama akümer (2 Kor 5:17). Tekümtet mapaji yang nung jagi tenzüker. Aji oda, kodang asenok taküm ya tasen poktetli ama akümer, iba anogo nung jagi Tsüngrem den jaja tenzükdang anogo shia asen taküm tasenba - tasenba yanglulokyonga aotsü Tsüngremi imlar. Kodang asenok nem Tsüngremi tekümtet sempet agütsür, idangji asenok pelar aser iba tepelaji mesamadaktsüi tanüla temeshi agi asenok sünga alitsü Tsüngremi imlar. Kodang asenok Tsüngrem nungi tekümtet angur, asen takümüji Tsüngrem meyong akümer, anungji asenok taküm ya asen mulungba nung masü saka Tsüngremer mulungba nung aotsü. Laishibai ashir, Tsüngremi asenok nem Pa temulung chia inyaktsüsa mulungtetdaktsütsü aser inyakdaktsütsü asoshi asen mulung nung inyaker. Ibai asenok atema teshisadangtsü aser teinyaktsü mapa tuluka lir. Tsüngrem atema inyaktsübaji Tsüngremi dang asen mulung nung mulungtetdaktsür aser inyakdaktsür. Aji oda, Khristan taküm kati angateta inyaktsüba mapa kaji asenoki anogo shia Tsüngremi asenok dak temulung lemtettsüsa kanga kümdanga inyaktsüla. Ajisüaka, ano külen Tsüngremi dang asenok nem Pai mulungba inyaktsü mulungtetdaktsür aser inyakdaktsür ta bilema Laishibai ashi ama kechi inyakdir, "kangkakangji mesüra tashishiba kecha medeni inyaktsüla." Filipi 2:14. Itemji Tsüngremi agütsüba tekümtet mapatemji lir. Kodang Tsüngremi asenok taküm nung inyakba metetdir, asenoki Pa den külemi Pai mulungtetdaktsüba aser inyakdaktsünübaji angateta inyakra, iba jagi asenok dak tekümtet alibaji ano tali tejangjaba meteta inyaktsü.

OLEMSABANG

PAR AKA, ASEN MAKA...!

- Lipoksungkum Imsong

(Yashi adok nung...)

14. *First green village shir* meyong? *First sustainable village* kong lir? *First woman cabinet shir*? *First woman MLA* a shir indang? Ya nungja ji dang bo masüako. Iba nung ya tagitsü aser tebilemdangtsü lir!
15. *Tatishitsü ka Foothill* ya par ishika maten inyakba agi teinyaker dak teranglok a merangloker ba tu?
16. Akhi Dimapur *area* nungi MLA 5 nungi nütsüng yongsük dak mapet asenoki ariana ka sota lir, mekümdangra ajia oadoktsü.
17. Joko anüdoklen pur yakta dang **autonomous** akümtsü aser tanüngba pur ji külen asen dak merangloker ta süra asenok kecha maka den kisüng anüngtsü.
18. *Ao gazetted officers and government servants* ajemba jembiogo. Shitak. Saka ibaarea nungji dang masüa ko. Arogo temang NBCC / NCRCC nung jia tekolak bo yujang teben, tetsüng, tebenlak kecha nunga Aor mali. Asen kisüng masü ji melentepba inyaktsüako saka joko talangka mali ba ya bo tebilemetsüka. *Contractors* aser shishilembaba nunga asen rogo atua alir ajak ji ajemzüka yutsüdi asürja. Saisapong aser kentenmenü nunga majungbo masü ser nung Aor ji takokba tashi anidoktsü meranger amai dang inyakyim tem nungi angur.
19. Naga nunger arok loktitem oda NSF a süang, tang khen anena aliba agi dang ashi Naga Hoho, NMA nunga asen mali kechiyong asenok sasep telung nung tzükong 6 khen raktepdang pii agiadoker.
20. *Gazetted officers*, *tatishitsü* agi pi kin bo inti telongjem ka lir aser iba kübok loknü aika alitsü. Asen bo *inverted pyramid*mesüka tenzükogo. KAOT lir, tan tu DZAOT tenzükogo, ano Mokochung *zone* pur anünga lir. Inti nung AOT (Aor Officers Telongjem) ali nunga tashi taitba sülana ta jia bilema liogo? Ashiko *area wise* dang asüba jagi nükjidong tuluba ataloker alitsü jia takoktsü lir.
21. Hauni tzükong ajak yimtsüng ajak *rotation* nung lokti tem aniba ji kanga junger, awashi tajung saka arogo loktia süang, alima yimden lokti a süang iba tzükong shilem / yim shilem / kidong shilemung ya tali ranglokba agi mapang aika nung nisung tetemsü ka lir ser nung par yimer, par kidong mesüra par tzükong shilem masüba agi *rotation* agi ataba tsüngru masong ka nem anidaktsüba ngua arudar. Ya shisaka mapa masü tamachi mapa.
22. Asenok *state* balaka razüka jia otettsü masü, *autonomous council* jia mangutsü saka *state* ka kübok *district* ka sa alitsü. *Capital* nung akaba jia ajak makatsü saka asen lima nunga akatsüla ji bo akatsüla. Kin kar dak teka tongloktsür masü yangi shinübaji asenok bo asen tsüngda menden raktepa kazüdang tangar ajak tashikang tululu adoker yimzüka oadoker. Mezüng ashi ama, asen kin '*crowd funding*' südi ta ashirba masü saka *Department*-i inyaktsü aika meinyak lir; iba den *government* nungi bo mapa tajung ka atema sen agizüka lir ser nung nübur atema meinyak la indang sübok nung dang ajak yua lir. Tangar bo tangar sülen sa lir saka kanga bo ano memenodang *department* dang jia teinyaktsüla bo inyaktsü ajungshidi ta masü 'khangzükd'; shir sübok nung lokti indang sen yua lir joko ojang dang yudaktsütsü lokti tentet, arogo aser kija shiai mapatong ka tenzüksüla (yur akaba ji bo meyipa meshitsü tasak asütsü saka iba sülen nungi danga tim inyaktsü mita ata lidi). (- *The Going, Aor*)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Billy Graham'er jalai züluba kaket 'Preparing to Meet Jesus' sayatsü



Nüngtugu sayutsüngir, asür Billy Graham'er jala Anne Graham Lotz (ajichilen) aser Lotz'er jala, Rachel-Ruth Lotz Wright na noksa nung angur.

August 3, 2023: Nüngtugu sayutsüngir, asür Billy Graham'er jala, Anne Graham Lotz-i, lai Yisu Khrista ajurutsü atema renemer; yamaji Khristan ajaki renema alitsüla, ta ashi.

Osangbener den jembidang arrshi küm 75 Lotz-i, "Alima nung tatalokbatemji Yisu Khristai ashiba ama atalokdar aser asenok putu talak ka nung alir. Iba putu ya kü putu ta ni amanger," ta ashi.

La ya mama cancer nungi taneptsü angur ka, la kinüngbu Daniel Lotz 2015 küm asü aser

küm asem dang lir tebu (Billy Graham)-a asü.

Iba dak sendakba nung Anne Graham Lotz-i, joko la atema takümü teti tatem makaba taküm nung rangloksü dang, ta ashi.

"Ozü jabaso medemer ka asüba asüpila sentong nung adenba sülen ni yagi aru. Tena high school külemi azüng, pa arrshi küm 53 liasü. Pa aonung amoi aoba sülen tasüngnepbo kodak nung ang saak. Na kodang tatem maka nung ajemoktsüar nai memetet. Iba

mapang nungji na renemtsü atema mapang malitsü, anungji renema alitsüla," ta lai ashi.

"Preparing to Meet Jesus: A 21-Day Challenge to Move from Salvation to Transformation," kaket indang omenji 'renema aliba' lir, ta lai ashi. Iba kaket ya August 8 nü sayatsü.

Lai iba kaket ya lar jala, Rachel-Ruth Lotz Wright den sentepa zülü. Iba kaket nung Lai tekongtem aser tekülem leniba lir, koba ajanga tamangertem tanela nung aintsü.

Khristantem reshikangshiba survey nung shilem agitsü ajungshir

August 05, 2023: Tan hopta Christian advocacy group- Voice for Justice UK (VfJUK)-i UK nung Khristantem reshikangshiba jenjang asadangtsü atema online ajanga survey ka tenzükba sülen anogo ana tsüngda shilem agirtemi telangzüba 600 dak tema agütsüogo, ta metetdaksü.

Tan hopta online questionnaire ya tenzüka liasü.

Tesüba küm ishika nungi tenzüka Khristantem magizüktetba aser bendangshidanga züngshiba tebilemstü tuluba akümba mapang ka nung iba survey ya agir, iba sülen taküm September ita nung VfJUK-i Commission of Inquiry into Discrimination

Against Christians (CIDAC) tenzüktsü.

Iba survey nung mapa inyakba tesemtem, shisaliok rejutem, social media platforms aser anogo shia tesem balala nung Khristantemi ajangshiba timtem balala lemsateptsü atema iba survey nung shilem agitsü asoshi Khristantem ajungshir.

Yamaji Khristantemi tensa balala ajangshiba jungjunga asadangtsü nükjidong nung Khristan denomination balala dang online survey nung shilem agia tasüngdangba balala langzütsü/lemsateptsü ajungshir.

VfJUK-i ashiba agi, tang tashi nung telangzüba balala anguba ajanga- Khristantemi timtem balala ajangshiba

jangjaogo aser item rongnung Khristantem akhüm-metsübuba, tilutsüba aser sendokba densema lir.

Ano Khristan karibo, parnoki Khrista dak amangba ajanga mapa mangur, ta ashi.

Iba survey dak sendakba nung Voice for Justice UK tentetla, Rev. Lynda Rose-i, "Khristantem sendokba aser bendanga züngshibaji atangji asü masüar metettsü nükjidong nung onoki iba survey agir," ta metetdaksü.

Taküm September ita nung Commission of Enquiry into Discrimination Against Christians (CIDAC) tenzükba mapang iba survey osang tejangja sangdongtsü.

Tang mezüng Mizoram nung Arogoi National Protest Day amongtsü

Aizawl, August 05 (Agencies): Presbyterian Church of India, Mizoram Synod-i Arogo nung züngsemtem dang August 10, 2023 nü peipei Arogo nung National Protest Day nung shilem agitsü mepishia metetdaksüogo.

Tang mezüng Mizoram nung Presbyterian Arogoi National Protest Day ayongzüka amongtsü.

Mizoram nung Arogo tulutiba- Presbyterian Church (Mizoram Synod)-i, linük Tiri Muslim nunger aser Dalit nunger Khristantem nem 'scheduled castes' jenjang

magütsüba anema linük tesem ajaklen National Protest Day ayongzüka amongtsü, ta metetdaksü.

Arogoisa züngsemtem dang August 10 anepdang sarasadem sentong ka ayongzüka agitsü metetdaksü.

National Council of Churches in India, Catholic Bishops Conference of India aser National Dalit Council of Christians-i Dalit aser tribals/ Adivasi nunger tebilemstü onük balala Arogo den lemsatepogo, ta Arogoisa metetdaksü.

1950 küm India Tiri, Dalit nunger shirnok Muslims aser Khristantem lir, parnokji

'scheduled tribes' ta züngshitsü makok ta sangdongbaji India Temzüng nung Arrla 14, 15, 16 aser 25 alema lir, ta Arogoi metetdaksü.

Presidential (scheduled caste) Order 1950 ji 1950 küm August 10 nü taoba mapang India Tiri sign süa liasü. Iba sangdong nungji yamai shia lir, "Hindu nunger dak alaka tanga yimsü amangertemji scheduled caste züngsem asütsü makok."

Tesülen iba sangdong melenshia 1956 küm Sikhs nunger aser 1990 küm Buddhist yimsü amangertembo 'scheduled caste' nung züngoka liasü.

ANO GO ABEN TSÜNGREM DEN

SHITAK TENDANGBA

"Asenok ajak tamang telungjem aser Tsüngrem chir metetba shisatsü kesasa tongteta maküm tashi, aser nisung tain maküm tashi aser Khrista tabensaba temang tasazük tongteta maküm tashi"

~ Efesa 4: 12

Mapang ka student kati classroom nung aliba tableji thermometer agi asadanga alidang par tesayur aru; aser aji ngua pa kanga süngmang. Tesayur Dave küm 15 tesayur asoshi iba ya kanga taoksatsü ka liasü. Kechiaser iba student ya ruler aser thermometer ana tebandang memeteti temaba class-i atutsüba na-ta süngmang.

Iba otsü angashidang iba student ya par class-pur dang nungi tangazükba jenjang nung talangka tesülen atsüngzüka lir ta bilem. Tetenzükdak kimong junga metenzükba ajanga aika pi memenepi atsüngzüka alur.

Aiben tanela jenjang asenoki aibelena asadanger. Arogo tulu süra tanela nung tashi taitba; mesüra aikati sapua amshiba sayutsüngirji kanga nüngtugu masüba sayutsüngir dang nungi temeshiba ta bilemer. Tanela jenjang shitak asadangbajibo ajemaluba, tesüngjem, talangka aremzükbaba, temeim nung kati ka den azüzüktepba (Eph 4: 1 & 2) item ya lir. Iba yagi Khrista tabensaba temang tasazük tongteta akümtsü yarir.

SARASADEM:

Kü taküm aser tanela jenjang seret oteta aliba taküm ka ni kümdakjang. Amen.

NTK lenir, Seeman-i Muslim aser Khristantemji satan chirtem ta ashi

Chennai, August 05

(Agencies): NTK lenir, Seeman-i, Muslim aser Khristantemji satan chirtem, ta ajaba atema Manithaneya Makkal Jawahirullah-i Seeman aitsüogo.

Jawahirullah-i sangdong ka ajanga Seeman dang, pai Muslim nunger aser Khristantem dang tatok meshitsüla, ta takhangba agütsü.

"Longkak aitba Jawahirullah-i, tenüng atemer Seeman-i nüburtem miim agi menentsüogo, aser pai jembiba oji aitsütsü tetemsü. Seeman-i Muslim nunger aser Khristantem dang satan chirtem ta ajaba atema pai tatok meshitsüla," ta Jawahirullah-i ashi.

Manipur nung rara aitsütsü atema taoba Amongnü NTK-i Chennai nung longkak aita liasü aser iba sentong nungji Seeman-i, "Linük nung rara adokba ajakji Khristantem aser Muslim nunger ajanga lir. DMK aser Congress nem vote agütsüba ajanga Muslim nunger aser Khristantem satan chirtem kümogo," ta jembia liasü.

"Manipur rara nung rara adokdaksürtem aser ola madokertemi Muslim aser Khristantem anema inyaker. Seeman-ia Muslim aser Khristantem anemer. Ibaji ajanga Seeman-i shiba atema inyaktsüar jangjar," ta ashi.

AO OSHI ANGAZÜKDAK:
TANÜ ANGAZÜKTSÜBA OJANG



Rongjen

(v) kija azüngmeyaka aliba (loneliness)

* Asenok bendanglen alidang aiben **rongjener**.

Rongjenset

(adj) kanga azüngmeyakba (feeling very forlorn)

* Apuani alima nungi piladoker kanga **rongjenseter**.

OLONG PAITEP # 6598

	1			2	3			
4			5					6
					7			
	8							
	9			10			11	
					12			13
14								
					15			

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapang süiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6597 TELANGZÜBA

TIPIEN :

- 1. Temeja, 5. Semtu, 6. Tat,
- 8. Arakset, 11. Rem, 12. Ara,
- 13. Ber, 15. Oba, 17. Ayoklar,
- 19. Ola, 20. Raksa, 21. Mangsa.

LANGTSÜNGLEN :

- 2. Jayajako, 3. mese, 4. Tula,
- 6. Tera, 7. Tama, 9. Sobaliba,
- 10. Teroro, 14. Rata, 16. Wara,
- 18. Yisu.



KANGASA TEKORO TEBU O TANUR NA :



Tanur : Oba, nai teti ashiba amato ni senpak metsü kümzüksü mechi nung rickshaw ka sülen asema arua atongera!

Tebu : Tamagitsü ati, autorickshaw ka sülen asemyonga aru asübo nai sen noklang ka save sür lilato, tagidak maka!

~ Lilir : WhatsApp

Manipur ajunga ghonda 24 mokdanga ayu



Assembly Constituency 27 Coordinating Committee-i state ajunga ghonda 24 mokdangba mapang neburtemi Army gari nokdangba noksa nung angur.

Imphal, Luroi/August 5 (Agencies): Assembly Constituency 27 indang Coordinating Committee-i state ajunga ghonda 24 mokdanga ayutsü ayongzükba sülen Honibarnü Manipur nung aogoshia inyakyim dak kongshia liasü.

Manipur nung tang tensa mejungi aliba aser tang jongdak nüngdaktem sensaksemtsü atema Emergency Assembly Session ayongzüksü khanga state ajunga mokdanga yua liasü.

State ajunga mokdanga ayuba sentong ya Hokolbar aonung ayaterem nungi tenzuka liasü.

Kasa mapang nung official osang ka ajanga ashiba agi,

State Cabinet-i Manipur Angh dang 12th Manipur Legislative Assembly 4buba session August 12 nü ayongzuka amentsü benokogo.

Ajisüaka committee convenor L Binod-i ashiba agi, Assembly Session August ita hopta tasembuba nungang ayongzuka amentsü aliba ya kanga tia maka.

Committee-isa, sorkar dang Emergency Session ka ayonga jongdak ken o tem sensak asemtsü aser Parliament monsoon session, koba August 20 nü tembangtsü lir iba ya metembang tsüngda bangzüng ka yoktsü mepeshia metetdaksüogo.

State ajunga mokdanga ayuba dak sendakba nung iba

sentong pusemertem meyrejang aika adenshia state kübok tesem balala nung lenmangtem mokdanga ayu. Business establishment, dokan, yokyatsüyartem, hotel, motel, entertainment house aser oil depot ajak shibanga liasü.

State mokdang aliba mapang school ka danga inyaksangshi mesüi liasü.

Maneni Inter-state aser inter-district buse tema inyaksangshi masü aser iba den taxi aser autorickshaw tem ajak mesenzükdaksü. Ajisüaka tayimtsübo teti ama senzüdaksüogo. Nüburtem senzusenpong nokdangaka, temzüng ozüng azüoktsü atema security force aser police garitembo senzusenponga liasü.

Assam: RSS arms training dak sendakba nung nisung ka apu

Guwahati, Luroi/August 5 (Agencies): Tawa Assam kübok Mangaldoi nung Rashtriya Bajrang Dal pur arms training camp dak sendakba nung Guwahati Police-i ano nisung ka puogo.

Police-i pua aliba nisungba tenüng ya Rahul Chetry ta jangaogo.

Pa ya Noonmati Police-i apu aser iba tatalokba dak sendakba nung tang ken o ashishiba mapang ka lir.

Chetry mapu tsüngda kasa

ken o nung Bijoy Ghosh aser Gopal Boron a pua ken o ashishio.

Bijoy Ghosh ya Mangaldoi nung par kidang apu aser Gopal Boro ya Udalguri kübok Dimakuchi tesem nung pua liasü.

Rashtriya Bajrang Dal puri July 27 nungi July 30 tashi Assam kübok tesem balala nungi lanurtem atema Darrang district kübok Mangaldoi nung school ka nung arms training camp ka ayongzuka agia liasü.

Parnok training agiba indang video ka social media nung prokshiba sülen iba inyakyim temai adok.

Video nung Rashtriya Bajrang Dal züngsemtem arms training agiba nguogo.

Iba training camp nung nisung 350 shi-i shilem agia liasü.

Video asadanga aser iba lokti tentet nungi lenirtem dang ken o ashishiba sülen Assam DGP-i Darrang Police dang ken o benoktsü atema tetuyuba agüja liasü.

Manipur: Bishnupur nung Meitei nunger 3 tepset

Imphal, Luroi/August 5 (Agencies): Honibar anepdang züngia Kuki nunger telungpurtemi Bishnupur district nung nisung asem tepsetogo.

Iba tatalokba indang osang ya Bishnupur district nung Phougakchao Ikhai Police Station kübok Kwakta Ward No 8 nungi agüja liasü.

Asürtem ya Yumnam Jiten, Yumnam Pishak aser par jabaso Premkumar ta jangaogo.

Police sources-i ashiba agi, buffer zone ajanga nisung kar Meitei nunger aliba tesemi ait aser parnok dak injang khalokja liasü.

Buffer zone koba central force temi nüka lir iba ya Kwakta nungi km 2 shi pilar amenoka lir.

Iba tatalokba sülen police aser Manipur Commando temi iba tesem meketbang aser telungpurtem bushia liasü.

Osang ajanga ashiba agi, Kwakta aser Terakhongshangbi

len telok ana tsüngda maneni khatepdar.

Lendong nungsa commando Maira Paibi aser civilian ana yirua liasü. Kwakta aser Bishpur District Hospital nung temang anepaluba sülen parnok Imphal Hospital-i anirogo.

H o k o l b a r n ü a Terakhongshangbi nung Kuki aser Mei telungpurtem tsüngda khatepba mapang tetsür ana yirua liasü.



Nagaland Tourism Department-i nungita Longsa Village Council-i Longsa yimdak Tsüngremmung benjong Aug 1-3 tashi amungba mapang, telok kati yar tsüngsang aidang tangokba noksa nung angur. (Longsa, 3rd, 2023)

Taoba Pakistan PM Imran Khan puogo



Honibarnü Lahore nung taoba Pakistan Ato Kilonser Imran Khan'er kidangi aoba lenmang mendanga atatsü asoshi police tem renemtepba noksa nung angur. Pakistan nung okadak kati taoba PM Khan ya küm asem tepuokdak ayutsü atema obendang agütsüogo.

Lahore, Luroi/August 5 (Agencies): State sempet ozüing alema ayokba atema Pakistan trial court kati küm asem tepuokdak ayutsü atema obendang agütsüba sülen police-i taoba Pakistan Ato Kilonser Imran Khan Lahore yimti nung puogo.

Arishi küm 70 tain yimsüsür yagi pa Ato Kilonser asüba mapang 2018 nungi 2022 küm tashi nung bendang lima semdangba mapang anguba sempetem sen million 140 alang alizükba aser ayokba atema aitsüogo.

"Obendanger Humayun Dilawar-i ochi mashi inyakyim nung shilem agiba kuli agütsüogo," ta Pakistan TV-i Honibarnü metetdaksü.

Obendang agütsüba mapang pa dang senchi sen 100,000 chiogo, koba magütsütetera iba melena ano ita trok tepuokdak ayutsü.

Khan okatsür Intezar Panjotha-i, Reuters news agency dang ashiba agi, police-i Khan par kidang nungi pur ao. "High court telemtetba dak sendakba nung onoki tashishiba ka benoktsü," ta Panjotha-i shisem.

Pa mapu tsüingda mangaoka süa social media platform X nung lemsatepba video ka nung Khan-i pa pusemertem dang yimtung nung longkak aittsü ayongzüka liasü.

"Ni nenok dang nungi langka ka dang mepeshir. Nenok pei

kidang ajem ajema mamentsüla. Ni timtem ya kü atema masü saka linük atema aser nenok atema aser ner chirnurtem tarutsü atema lir," ta pai ashi.

"Nenoki nenok temeden atema menokdakra nenok alar ama alitsü aser alar ama alitsüji kecha nüngdak mali," ta paisa shisem.

Iba osang nung Khan-i "London Plan" indanga shisema lir. Iba olong ya pai, tang chief General Asim Munir aser taoba PM Nawaz Sharif nati pa yimden yimsüsüba nungi agintsü atema tasa asaba indang jembiba mapang amshir.

May ita ken o balaka nung opposition lenir ya pua sota ayuba sülen yimden yimsüsüba nung mepetmesü tulu adok aser iba sülen Khan pusemertem aser police tsüingda mangatettep tulu adoka liasü.

Honibarnü Khan apuba dak sendakba nung osang agütsüba mapang tashi nung yimti ka nung danga longkak aitba indang osangbo maliasü.

Al Jazeera osangbener Kamal Hyder-i Islamabad nungi ashiba agi, inyakyim nung Ato Kilonser-i osettem state indang safe house nung riziunga ayutsü nüngdaker, saka Khan-i item osettem tajangzük keta ayokba atema pa aitsüogo.

Sempettem rongnung watch, perfume, diamond jewellery aser dinner set tem densema liasü.

Hyder-isa, May 9 nü Khan apuba mapang longkak aiter meyirejang aika anema ken o benokogo aser longkak aiterem aika dang military court tem nung obendangba mapang lir.

Pakistan Tehreek-e-Insaf (PTI) party aser Khan indang legal team züingsem Babar Awan-i ashiba agi, iba o bendang agütsüba ya tamagitsü.

"Imran Khan nem ochi obendang magütsü, koba linük temzüing ozüing kübok lisopur ajak temeden lir," ta Awan-i Al Jazeera dang ashi.

"Onoki high court nung agütsüba iba obendang ya Pakistan temzüing ozüing kübok ashishitsü aser iba obendang ya magi akümtsü aser Khan takaratiba nung chioktsü ana nung lir," ta pai shisem.

Obendang agütsüba mapang Khan okadak maliasü. Taoba küm April ita PM mapa nungi aginba sülen Khan anema ken o 150 dak tema benoka lir.

Pai pa ken o kecha nunga aibelena mali aser iba ya yimden yimsüsüba dak sendaka lir ta shia arudar.

PTI lenir tejen Asad Umar-ia iba obendang agütsüba ya aitsüogo.

"Tanü obendang agütsüba ya temzüing ozüing kübok masü. Iba telemtetba ya Supreme Court nungbo magizüksü. Yimden yimsüsürtem atema telemtetba ya okadak masü saka nüburtem mulungjang nung agir," ta pai ashi.

China tzümettsüing lendong nung nisung 10 asü

Beijing, Luroi/August 5 (Agencies): Doksuri yipru tzüküm nungi pila aoba mapang China nung otsüsüsüsa tzüinglu kanga sashia arudar aser iba ajanga linük anütoktiplen tzümettsüing agi nüburtem kanga kangshitepdar aser nisung million aika dak kongshio.

AFP news agency sangdong ka ajanga ashiba agi, Hebei province nung tzümettsüing lendong nung nisung 10 süogo, ta ketdangsürtemi Honibarnü metetdaksü.

Beijing nung küm 140 tsüingda tang tzüinglu tesashitiba arudar, ta weather agency-i metetdaksü. Heilongjiang province nunga Muling ayong koba dang linük indang "great northern granary" ta ajar iba ayong ya-a lendong temaitsü agütsür aliba adena atur yimdar.

Honibarnü tashi nung nisung million 1.54 Hebei province nungi aninogo, ta Xinhua News Agency-i metetdaksü. Kasa mapang nung kümtem tsüingda tang yipru tamajungtiba agi China kongshiba sülen tensa azüoktsü atema China indang disaster relief system kanga

timtemdar. Taoba hopta tatemlen nungi tzüinglu kanga sashia aruba ajanga Beijing nunga kanga mejungi kongshio. Yimti nung school tem ajak shibangtsü aser tesem kar nungbo power agia timtemba ajangshio.

Heilongjiang province nung yimti tulutiba Harbin temeket nung nisung 54,000 shi tzümettsüing aruba ajanga pei ki toktsür aotsüsa kümogo, ta Xinhua News Agency-i ashi. Rescue team tem den rong 81 amshi nüburtem iba tesem nungi anindar.

Beijing nung ketdangsürtemi, Fangshan aser Mentougou amala district tem nung ali anenoka aiba, anentsüh aluba amala reprangshima atatsü tekümdangtsü metetdaksüogo.

China nung 1998 küm tzümettsüing tesashitiba arua liasü aser iba lendong nung nisung 4,150 asü. Asürtem ya timba Yangtze ayong küm nung alirtem liasü. 2021 kuma Henan province nung tzümettsüing aruba sülen nisung 300 dak tema süogo.

Ukraine-i Russia indang tanker ka raksatsü



Moscow, Luroi/August 5 (Agencies): Ukraine-i drone amshia amakba mapang Russia indang tanker ka raksatsüogo aser iba ajanga tzüyim nung rara dak rangloker Kyiv inyaksangshiba sayur.

Russia indang chemical tanker SIG nung waterline anasa engine room nung tapok ka apa, ta Russia indang marine agency-i Honibarnü metetdaksü.

Iba tanker nem teyari agütsütsü atema tugboats tem amshi, kechiyong iba tanker ya drone amshia amakba sülen mesenzüteti aküm, ta Russia indang Tass news agency sangdong ka ajanga metetdaksü.

"Tanker ya tang anena dang lir. Machine room tera raksago," ta Tass-isa metetdaksü.

Ajisüaka iba lendong nung nisung taküm samaba osangbo kecha mali.

Russia-i atsünger aliba Crimean peninsula aser Russia na sendaktepba apu nung senzüsenpong ghonda aika shibanga atar Honibar anepdang lapoktsüogo, ta Russia indang traffic information centre-i ashi.

Russia-i amenoktsür aliba ketdangsürtemi ashiba agi, iba tesem nung bomb apokba angashiba ya apu amakba masü. Iba apu ya taoba küm October

ita aser taküm July ita makogo.

Ukraine nunger ketdangsürtemi Hokolbarnü sangdong ka ajanga parnok indang drone temi Russia indang warship Olenegorsky Gornyak kanga mejungi raksatsüogo, ta ashiba sülen drone amshia iba tanker amakba osang sangdonga liasü.

Moscow-i ashiba agi, parnoki Novorossiysk naval base amaktsü merangba nokdangogo. Iba naval base amakba ya taoba küm February ita rara tenzüka sülen tang mezüingbuba Russia indang commercial port ka amakba liasü.

Ken o asadangertermi ashiba agi, Kyiv-i parnokia kidang nungi talang ka pila Russia indang naval forces maktettsü ta sayuner. 2014 küm Moscow-i Crimean amakba sülen Ukraine indang navy timba samatok aser rara tenzüka sülen tzüyim nung rarabo Russia-i dang amokbanger aruogo.

Ukraine indang navy ya Russia indang naval forces dang nungi kanga agi tashi maitba saka unconventional weapons aser tasatem amshia parnoki takok nguteta arudar, kong 2022 küm April ita guided missile cruiser Moskva raksatsüba densema lir.

Taoba US tir Donald Trump-i pa anema benokba federal ken o pongu nung pa aibelena mali ta shio. 2020 küm election inyakyim raksatsütsü merangba atema pa anema ken o benoka lir. Trump anema benokba ken o ya ano August 28 nü angadangtsü.



World Cup: Japan quarter finals-i iogo



Japan tsür Hinata Miyazawa-i (tachichi) lar team asoshi tasembuba goal idaktsüba mapang tangokba noksa nung angur.

New Delhi, Luroi/August 5 (Agencies): Tang asaya aliba tetsür World Cup nung Honibarnü Wellington nung Norway goal 3-1 agi akokba sülen Japan quarter-finals-i iogo.

Asaya nung arishi küm 23 tain Japan tsür Hinata Miyazawa-i la dak sempet tajung aliba sayua asayamung nung goal pongububa idaktsü aser la tang iba asayamung nung goal timtiba idaktsüba asayar kümogo.

Asaya nung mezüngbuba goal ya Norway tsür Ingrid Syrstad Engen-i own-goal ka idakja Japan tejakdang ser tenzük, ajisiüaka asaya mezüngbuba shilem matem tsüingda Guro Reiten-i Norway atema goal idakja goal 1-1 nung asaya mezüngbuba shilem tembang.

Asaya tanabuba shilem nung Japan-i asendenshir goal idaktsütsü atema nongshia

asaya aser Norway defence nem timtem aika agüja liasü. Iba sülen Japan atema tanabuba goal ya defender Risa Shimizu-i idakja liasü.

Iba asayamung nung Japan team-i group stage nung goal 11 agüja asaya asemprongla koker round of 16 tongteta liasü.

Kasa mapang nung Norway pur mezüngbuba asaya nung New Zealand-i akok aser iba sülen Switzerland den drawa asü aser tasembuba asaya nung Philippines 6-0 agi koka liasü.

Honibarnü asaya ya tetenzük nungi Japan-i amokbanger asayar aser ball position shilem 60 parnok meyong liasü.

Miyazawa-i asaya tenzük second 60 tsüingda mezüngbuba goal idaktsütsü asoshi maongk angu saka magütsütet, ajisiüaka minute 15buba nung Miyazawa-i cross asüba ball ka Engen dak tsükdaker par goal-i ia Japan goal aka agi tejakdang aküm.

Ajisiüaka mapang tatsüka dang lir Caroline Graham Hansen-i agütsüba ball ka Reiten-i kanga junga tongokja goal 1-1 aküm.

Reiten-i idaktsüba goal ya Japan team asoshi iba asayamung nung mezüngbuba goal achiba liasü.

Asaya tanabuba shilem nunga Japan team-i goal idaktsütsü asoshi nongshia asaya aser parnok rongnungi West Ham nungi asayar Shimizu-i team asoshi tanabuba goal idakja liasü.

Maneni tanabuba goal küptoktsü atema meranga asayaba mapang Norway team asoshi Karina Saevik aser Frida Maanum nati maongka angu saka goal magütsütet,

Iba sülen asaya atemtsü minute teku anunga lia Miyazawa-i Japan atema tasembuba goal idakja parnoki asaya akok.

Manchester City-i Josko Gvardiol alizükogo

Luroi/August 5, 2023 (Agencies): Manchester City-i sangdong ka ajanga RB Leipzig nungi asayar Josko Gvardiol den euro million 90 yong kümpongu atema tenangzüktepba yangluba sangdongogo.

Arishi küm 21 tain asayar ya 2023/24 season nung summer transfer window nung City-i alizükba asaya tanabuba kümogo. Parnoki Croatia nung international asayar Mateo Kovacic alizükler liasü.

Kovacic ama Gvardiol-a senior career Dinamo Zagreb nung tenzük. Par linük nung küm ana asayaba mapang pai Croatian League title ana, Croatian Cup ka aser Croatian Super Cup ka akokba sülen Germany nung RB Leipzig-i ao. Gvardiol 2021-22 aser 2022-23 season nung Leipzig nungi asaya 87 nung asayaogo aser iba mapang pai goal pongu idaktsü aser DFB-Pokal trophy ana koka liasü.

Pa tang tashi nung Croatia



Josko Gvardiol

asayatsü maongka anguba ya kü atema tetushi ulura.

"Shirnokisa taoba season Manchester City pur asayaba nguogo parnoki iba team ya alima nung team tajungtiba ta meteta lir. Asayamung tongtibang asem tashi akokba ajanga team jenjang sayur.

"City nung densemaba ya ni aser ozü kibong asoshi kanga jangrademtsüka lir.

"Pep Guardiola den inyaktsü maongka anguba ya jangrademtsüka asütsü," ta pai ashi.

Kasa mapang nung Director of Football Txiki Begiristain-i, "Josko Manchester City nung adenba atema kanga pelar," ta ashi.

"Onoki pa mapang talangka nungi asadanga aruogo aser pa sempet tajung aketba asayar ka ta bilemer. Europe nung club tongtibangtemi pa alitsü atema asdanga aruogo anungji pa club-i aruba ya osang tajung lir," ta pai ashi.

Compound archer Aditi Swami senior world champion kümogo

New Delhi, Luroi/August 5 (Agencies): Arishi küm 17 tain India tsür Aditi Swami-i, maneni kanga junga asaya World Archery Championships nung Honibarnü compound women's category nung senior world championship kokogo.

Junior world title abenba sülen ita ana majung tsüingda Aditi-i senior world championship kokogo. Lai final asaya nung la dak sempet tajung aliba sayua Mexico tsür Andrea Becerra koka gold medal nguogo.

Satara nung archer yagi July ita Limerick nung Youth Championships asayaba mapang Under-18 title bena liasü. Tang lai senior level nunga takok tajung ngutetogo.

Final nung Aditi-i kanga süngjema asaya aser la dak aketba sempet tajung sayua

points 150 angutsü aliba nungi 149 ngua liasü. Laisa, pre-quarterfinals nung reigning champion Sara Lopez tsükdakja liasü.

Kija asaya nung takok mangu tsüingda Aditi-i, Parneet Kaur aser Jyothi Surekha Vennam na den külemi World Archery Championships nung India atema mezüngbuba gold medal nguteta liasü. Par aseme compound women's team final nung takok tajung ngua gold medal angu.

Kija asaya nung semifinal nung Aditi aser külem India tsür Jyothi Surekha Vennam na asaya liasü. Iba asaya ya Aditi-i 149-145 agia akok.

Kasa mapang nung Jyothi-i Bronze medal atema asaya nung point 150 nguteta Turkey tsür Ipek Tomruk koker bronze medal nguogo.

Australian Open: HS Prannoy final-i iogo



HS Prannoy

Luroi/August 5, 2023 (Agencies): Honibarnü Australian Open Super 500 badminton asayamung tebur kija asaya semifinal nung India nung asayar HS Prannoy-i Priyanshu Rajawat koka final tongtetogo.

Deobarnü final nung Prannoy, China nung asayar Weng Hong Yang den asayatsü.

Semifinal nung Prannoy-i 21-18, 21-12 agi Rajawat madak takok ngua liasü. Tena tsüingda minute 43 asaya.

Prannoy aser Rajawat na tang tashi nung anaben asayaogo aser anaben prongla Prannoy-i kokogo. Pai, 2022 kübok Syed Modi International nunga Rajawat koka liasü.

Prannoy-i hopta tepeyong kanga junga asayaogo aser quarterfinals asaya nung world number 2 asayar Anthony Ginting dena koka liasü.

Honibarnü Prannoy-i kanga junga asayaogo aser pai kanga süngjema asaya Rajawat nem aibelen aika menadakja asaya.

Rajawat-i asaya kanga junga tenzük aser 2-0 agi pa tejakdang liasü saka Prannoy-i tanem

tanemi point bendena asaya aser point pezü atonga ngua pa tejakdang aküm.

Rajawat-i attack asütsü meranga asaya aser jump smash tajung ana maloktsüba sülen point 7-7 ta kasasa aküm, ajisiüaka pai aibelen aika menaba ajanga break tashi nung Prannoy point ana agi tejakdang liasü.

Madhya Pradesh nungi arishi küm 21 tain asayar yagi rally talangla asayaba mapang aibelen memenai asaya aser break sülen mezüngbuba point pongu nungi pezü nguteta liasü.

Asayar ana kanga toktepba asayaba sülen point 14-14 ta kasasa aküm aser iba sülen 18-18 aküm, ajisiüaka Prannoy-i kanga atasa asaya aser tanungba poing ajak nguteta mezüngbuba game akok.

Tanabuba asaya nunga Rajawat-i maneni aibelen aika mena aser Prannoy 5-2 agi tejakdang aküm.

Asaya nung Rajawat-i smash tajung kar ama saka pai maneni aibelen aika mena liasü. Lanur asayar yagi takok tashi meranga asaya aser point pezü atonga anguba sülen 7-7 aküm. Break tashi nung Prannoy 11-7 agi tejakdang liasü.

Break sülena Prannoy-i tajungba asaya 18-11 aküm aser match points ti tashi nguteta liasü aser iba sülen pai asaya ayong ayonga akok.

Rajawat asoshi Super 500 asayamung ka nung tang mezüngbuba semifinal tonga asayaogo. Pai quarterfinal nung Kidambi Srikanth 21-13 21-8 agi koka liasü.

BILEMDANGANG

"Anogoshia mapa tajung inyaktsü maongka lir. "